

龍溪縣志卷之十五

人物

龍湖父子天城弟昆以言乎邑似寥落以言乎家則極盛矣蓋自其胚胎初啓已具駸駸之勢故由宋迄今其有聞於世者踵相接焉是編依舊志而增益之唐人物無多統名列傳宋以後分名臣宦績理學儒林忠烈孝友敦行文苑隱逸而附以藝術別以寓賢非敢云表章曩哲留不朽之鴻名亦竊比於襄陽耆舊汝南先賢使後世有述焉已耳

志人物

龍溪縣志卷之十五 人物

唐

列傳

陳珣 陳艷 陳謨 陳詠 周匡物

附匡業 王勇 王義重 謝條 洪文用

陳珣字朝珮先固始人祖政出鎮綏安舊龍溪地因家焉少

受學於別駕許天正以善詞賦稱父元光曰是兒非

戈戟下士乃臺院秀儒也萬歲通天元年舉明經及

第授翰林承旨直學士見武后稱制疏乞歸養縣令

席宏聘主鄉校闢書院於松洲與士民講習時州治

初建俗尚固陋珣開引古義於風教多所裨益元光



戰沒珣哀毀頓絕廬墓於大峙原朝命奪情代州事  
懇辭不起服闋乃視事開元三年率武勇夜襲巢峒  
斬前刃父賊藍奉高者俘其餘黨二十餘年剪除頑  
梗訓誨士民澤洽化行表辭封爵不允乞衰齡復就  
松洲別業聚徒教授天寶元年卒諡文英子鄧孫詠

謨各有傳按舊志珣本傳有開元十九年登王維榜進士之語而選舉部又直書云萬歲通天

元年丙申王維榜明經陳珣是前後記載相差謬矣考唐父老舉陳鄧代父伯梁為刺史疏中云陳珣代事兵民胥慶復舉明經謝官歸休等語不云珣舉進士也且萬歲通天距開元十九年中隔三十餘載而珣已老不應舉明經歷刺史之後復應進士科也舊志周匡物傳云唐自嗣聖開漳百二十年登進士自匡物始益證珣登進士之謬矣

龍溪縣志卷之十五 人物

陳鄧字有芑珣子也舉秀才授辰州寧遠令甫之任父

老請闕陳奏謂鄧通達國體歷練事情願得為本州

刺史時刺史父伯梁偏將許平國俱貪賂漳人被毒者十餘年耆老朱興家余拱辰等數百人詣闕

陳奏云漳本荒微始得陳政屯戍繼得元光輯綏男珣代事兵民胥慶復舉明經謝官歸休朝廷遂以父伯梁許平國管束斯土盜賊迭起於澗壑老羸逃竄於山林酷害斯深塗炭已極今有新舉秀才授辰州寧遠令陳鄧乃元光之孫珣之子通達歷練如蒙使居祖職必能恢擴先業克紹前脩慰邊士來蘇之望

朝命可之授朝散大夫中郎將刺史漳州州士女歡

呼曰州主將軍孫來矣大歷十四年卒諡忠憲

陳謨字以忠鄧子也建中二年代父刺州事初政率直

不協輿情州民會拱壁等詣觀察使言之朝議以柳



少安刺州事而謨以中郎將檢校本州別駕少安精地理以龍溪可建州治未得請後謨卒成之以平廣寇功復兼漳州刺史

陳詠字正雅鄠子也年二十四觀察使試耕戰之法薦鎮龍巖輯安士卒刺史鄭昌仕表其器可比仇香乞爲京兆別駕宰相常袞召之力請外補授汝寧錄事轉恩州叅軍奉表至京京兆尹黎幹請於朝曰陳詠酬酢如鐘舍音大小隨叩如水待波方員隨器彼雖不銜於人人自難捨於彼乞留府攝治中事從之時籍元載家產禍幾波及事旣雪出招撫西蜀歸權攝

龍溪縣志

卷之十五

人物

三

京兆事令行禁止長安僚佐推重之十四年丁父憂服除補光州司馬二十餘年守職無玷以疾乞致仕弟訐四門博士

周匡物字幾本元和十一年進士初匡物未第時名譽早著嘗賦軒轅古鏡歌有云欲向高臺對曉開不知誰是孤光主王播見而異之曰會當與此子作孤光主耳後果爲播所舉士唐自嗣聖開漳百二十年登進士者自匡物始御試學殖賦鶯出谷詩爲時傳誦以讀書天城山勅改爲名第山人稱名第先生仕至高州刺史兄匡業貞元八年明經登第爲鄱陽令與



匡物齊名子漢傑漳浦令孫鄂脩明經術有祖風

王勇王義童初皆瑯琊人徙居龍溪勇改為東衡州刺

史義童初為泉州都督淳祐志督字下有缺文王義童又見通志秩官表長樂郡

刺史福清都督武德末年任王勇事未詳宋吳與漳州圖經序云王使君勳烈標時惜事蹟無考

謝脩清心藻思迥拔流俗當廣明西幸恥於事逆晦迹

窮巖中與其弟脩築室著書自適也至光啓廻鑿乃

出登第後人以其所居之圃為文圃山

洪文用五代時人官主簿不為時屈隱於文圃山有文

圃詩文集宋熙寧間有石蕢者字華甫以世胄薄遊鯁論忤權貴浩然而歸亦隱於此其所著

詩文皆以文圃名集數百年間後先相望清風照世鄉人楊志作三賢堂祀蕢及謝脩洪文用西蜀何致

龍溪縣志卷之十五人物

一為記

宋

名臣傳

劉衍黃願黃穎顏師魯鄭公顯

顏耆仲顏頤仲孫昭先余嘉趙師楷

孫叔謹

劉衍字成之治平二年進士博學有器識初授英州推

官呂大防辟衍同孔平仲王祖道三人赴材識茂明

科衍言時務諷及新法為有司報罷復薦知潮陽縣

歲大歉發縣帑佐以家貲運廣米以賑民得不饑元



祐元年改新州以禦妖賊功加騎都尉秩滿詣京與王安石議青苗不合安石折之曰汝等坐不讀書耳衍曰三皇五帝所讀何書安石默然遂力求致仕乞以所授章服賜其父鄉人榮之年三十八累辟不起壽八十餘

黃願字脩可彥臣子宣和中以父任補齋郎調晉江尉知上杭清流二縣歷樞密院國信所編脩大府司農寺少卿靖康初知楚州值京東震動有劉士忠者肆爲浮言願便宜梟士忠首以安衆乃請罪於朝璽書嘉獎之旣而車駕巡幸觀城壁脩固軍民晏輯除直

龍溪縣志

卷之十五

人物

五

徽猷閣加龍圖閣徙知揚州安撫淮南東路復加右文殿脩撰建炎二年金騎薄城下時相黃潛善猝命願赴京口因坐失守削秩高廟知其故未踰年盡復原官遂乞休官至大中大夫爵龍溪縣開國男優游里第十五事繼母以孝聞子孫數世皆以門蔭補官

黃穎字秀實彥臣子崇寧五年以上舍免省赴廷試時彗星見穎指陳時政無少諱忌置第四甲抑殿丙科調秀州崇德簿改應天府戶曹又改吉水教官累遷至著作佐郎繼兄願爲樞密院編脩官兼符寶郎時



兄願爲卿弟預入臺三人同朝奉魯國太夫人崔氏侍養時論榮之俄遷中書舍人方拜命爲忌者所中出提點江州太平觀穎溫恭廉介尤工書隸有周禮解義春秋左氏事類行於世

顏師魯字幾聖紹興十二年進士調番禺興化簿懷安丞改秩知寧德縣歷莆田福清閩陂洹水利四十里以治行薦除糧科院改添差成武軍僉判帥陳俊卿薦可大用召爲官誥院遷國子丞淳熙四年除江東提舉時天雨土日青無光師魯陛辭極論之謂田里未安狂獄未清政令未當忠邪未辨天不示變人主

龍溪縣志

卷之十五 人物

六

何由省悟孝宗聽其言尋除浙西常平使歲鹽百鉅萬本錢多不給師魯出帑緡盡償宿負下令亭竈不得私鬻比他路課獨最除直秘閣七年召赴行在疏論浙西圍築之弊語侵權倖復奏民有墾田未受租者但當正其租不宜乘以盜種法失重本意奏可著爲令除監察御史請增臺官以廣言路有葛揆者自外府得內殿宣引將補御史師魯亟奏謂朝廷雖乏材寧少此輩臣雖不肖羞與爲伍遂與揆外祠在言路三年每奏悉報可帝曰卿可謂知無不言除太府少卿黃中丞治舉師魯自代十年兼左司刑曹郎官



除祭酒規約率以身先教諸生治已立誠所取多名

士余復黃種顏域後皆為聞人除權禮部侍郎兼祭酒師魯三入

成均學政脩舉尋兼吏部侍郎有旨改官班特免引見師魯奏祖宗法度不可輕弛因言賜賚太濫應奉微勞皆得黃金雖內帑封椿不與司農經費然無功而與是棄之也十三年冬金人遣使賀正旦差充接送伴使却所過供饋十四年夏乞請外不允會高廟升遐洪邁請號世祖師魯率禮官鄭僑太常少卿尤袤入奏三上議狀詞甚剴切大約謂太上中興與光武同繼徽廟正統與光武異子雖齊聖不先父食恐

龍溪縣志

卷之十五 人物

七

在天之靈有所不安邁論遂屈其後廟號謚議皆如所請差充遺留體信使初顯仁遺留使至金逼令簪花聽樂師魯陛辭言今國勢固非昔比敵必不敢強以非禮萬一如此臣當守死以辭上為之惻然至北界沿途設宴力請徹樂至燕山堅辭簪花執射據經陳誼反覆慷慨金人終不能奪次日傳玉器刀劍令齎還師魯抗辨若遺留禮物不蒙全受上國所賜亦不敢領還復命奏事壽皇宣諭不易不易久之復宣諭曰禮可謂盡矣除試吏部尚書侍郎師魯久在銓曹守法惟謹曩時部胥為姦士夫有請卒無可否故



爲出入辭以要之師魯一裁以法故事侍從滿歲爲  
真師魯自登從列逾二年矣或云侍郎在儀曹許時  
今欲爲真如何師魯曰除命出朝廷某何敢預壽皇  
素知其忠誠奏事畢除命卽下旬日間兼吏部尙書  
屢乞引年謝事不允除吏部尙書兼侍讀帝方倦勤  
將遜位遴儒臣以遺嗣聖師魯與馬光宗卽位師魯  
首陳正始之說旋上疏乞歸除龍圖閣直學士知泉  
州陞辭奏乞親賢積學以崇聖德抑情制欲以養聖  
躬帝令侍從官餞送賦詩望泉首載官吏棧貨船稅  
永春上供銀例預借於民安溪縣職官田及逃亡產

龍溪縣志

卷之十五

人物

八

稅皆責民補納師魯悉俾免之會請行經界法監司  
下諸州議師魯因條上二利三害議遂止泉人立祠  
至家繪像事之紹熙二年進煥章閣學士令再任留  
意學校葺洛陽橋累乞致仕進寶文閣學士提舉玉  
隆萬壽宮復起知泉州未赴卒於家年七十有五師  
魯自幼莊重若成人孝友天至嘗曰窮通自有定分  
枉道希世徒喪所守故大節確如金石雖動與俗情  
不合而終皆翕然信服官至大中大夫爵漳浦郡侯

食邑一千戶贈宣奉大夫定泰二年諡定肅

府志論曰周翠

渠嘗論公爲侍從則議論稱旨爲州縣則深得民心  
特沮行經界一事未免爲賢者之累舊志以爲其說



不然謂漳之士田名色不一縱行之未必能成不知亦顧濶澤之何如耳近者丈量之法行而累朝之民困甦夫非經界之意耶惜乎定肅之見不及也

鄭公顯字隱之初以周禮魁於鄉又以詞賦預薦登乾道丙戌進士授富沙戶曹秩滿獻時事十論於朝授潮州教官改宣教郎宰同安縣有惠政除監進奏院遷宗正簿時災異數見應詔進三說謂指陳大政而毋撫細故直書事實而毋尚繁文此其二在大臣其詞簡其事核然後得以親覽而審擇之此其一在陛下除大府寺丞兼勅令所刪定官進權刑部郎官兼權直學士院遇慶會聖節有旨過宮稱壽宰臣率百

龍溪縣志

卷之十五

人物

九

僚拜表屬公顯援筆立成倉卒甚工求外補除浙西湖南倉使再入爲右司郎中俄兼左司歷官至中奉大夫龍溪縣開國男有旨與祠公顯問學有淵源爲文切當合法度尤長於儷語廟堂表制多出其手有文集十卷時事論十篇及語錄傳於世

顏者仲字景英以祖師魯蔭補承務郎調福州海口鎮置書院莊田製祭服鎮人生祠之遷知鄞縣寧宗升選差通判紹興又特差通判臨安寶慶二年擢進士第遷進奏院除知江陰軍脩學廩士會歲飢請於朝得米三千石全活甚衆召除大府寺簿遷屯田員外



郎吏部郎中壬辰策士充編排官除右司郎中直秘閣出爲淮東提舉兼提刑陛辭論君子小人所以異謂公論所與者爲君子所不與者爲小人帝聽之曰卿知守家法不事詭隨因扁所居曰知守堂除直寶謨閣樞密院副都承旨未幾又除司農少卿兼中書門下省檢正諸房公事出知池州改江西運判兼權隆興府召除大府少卿力丐祠提舉武夷山冲祐觀者仲雅愛士類所至以崇學校獎風誼爲先買田爲桂莊歲入錢四十五萬餘及田新墾者種可百斛積三歲入以贖計偕之士歲試士於平湖書院旌賞有

龍溪縣志

卷之十五 人物

十

差士論歸之官至中奉大夫爵龍溪縣開國男端平閒朝廷登用正人以二顏兄弟爲首云子鎮韶州司法鑰監惠州鹽場錄通仕郎

顏頤仲字景正師魯孫以祖澤補官歷寧化尉西安丞知縣事皆有美政丁內艱服闋調衡山未上委轉運司幹辦公事遷通判臨安府端平元年除將作監主簿出知嚴州時錢楮中半之令初行吏民震怒頤仲爭曰郡人純用楮而責以見鏹是強其所無也忤旨獲戾罪止一身便私自營害延千里朝廷不能奪令用全楮解發明年入爲司農丞攝金部郎官除直秘



閣兩浙轉運判官時禁旅饑出諄語衆且洶洶頤仲  
詰諸營撫定之除戶部郎知臨安府浙西安撫卒猶  
諄語頤仲曰昨撫諭從權耳今事定宜討有罪以尊  
國體密諭主帥物色鼓倡之尤者誅之左曹輪對言  
邇者火土交陵金月相守流星夜隕太白晝見訊諸  
占書其言可畏願嚴恭寅畏以弭天變又言紀綱者  
國之命脉二十年來紀綱蕩然宜絕宮中內降以杜  
私請進將作監仍兼府事輪對言今日兵驕楮賤皆  
由寬而不嚴致玩之漸散而不斂積輕之源又言約  
浮就實全在節用及中外弊事甚悉每奏輒報聞明

龍溪縣志

卷之十五

人物

七

年進大府少卿京尹如故嘉熙改元除廣西轉運判  
官首奏乞罷海外瓊崖儋萬四州鹽本錢云四州鹽  
賤如泥民不請於有司而有本錢之輸民不苦於淡  
食而有敷買之擾戶耗賦繁職此之由乞永罷帥臣  
願樽節爲四州解補又乞罷二十五州身丁錢云丁  
錢始於五季每丁十文旣而加倍至於十倍百倍米  
亦如之遠民以有身有子爲累竄於蠻徭逸爲盜賊  
實官吏驅之乞并蠲免皆報可三年令赴行在奏事  
言今日民死於敵死於寇死於饑而赤子不聊生今  
年陷襄明年失蜀又明年破淮而長江爲邊國勢岌



岌如此乞下哀痛之詔風勵有位革舊圖新以回天  
意除大府卿兼勅令所刪脩官遷司農兼左司四年  
兼權戶部侍郎以直寶謨閣知寧國府淳祐改元除  
浙東提刑旋予奉祠二年起知泉州以秘閣脩撰兼  
福建提刑去日民攀臥塞途四年起知溫州明年遷  
右文殿知慶元府沿海制置使奏蠲細民沙岸罷桃  
花定海官渡錢濬六十里渠及慈溪定海港堰脩學  
宮齋祠六年陞集英殿七年除寶章閣待制因歲饑  
遣百餘艘往廣州收糴仍奏乞常平二萬餘石以賑  
之詔俞其請全活四十餘萬八年除兵部侍郎疏乞

龍溪縣志

卷之十五

人物

主

祠十二年以刑部侍郎召言臣歷閩浙被水之郡建  
劍衢嚴願更加賑卹兼勅令所詳定官除權兵部尙  
書俄擢刑部兼知臨安府明年冬擢吏部尙書以寶  
章閣學士提舉玉隆萬壽宮年七十抗章請老名其  
圃曰畝忠里居強於爲善凶年樂施葺橋道設桂莊  
以助計偕者卒年七十五官階年歲皆與祖師魯同  
孫昭先字延父家世業儒父昌博學清脩爲鄉校領袖  
昭先登淳熙二年進士調興化簿民有枉率詣郡自  
列願於簿求直丁外艱服闋除坑冶司改知安溪縣  
爲政簡易催科有法凡差役必親按戶籍第其先後



民至有先期輸者脩學舍躬課督之撥廢利田以贍士通判婺州代還授分司糧科院俄改廣郡辭不就泰定初差辦行在諸司審計司輪對論謹名器嚴法度等事又言今之縣令責重權輕必使之無牽制然後可以盡其材而責其效敷奏詳敏帝嘉納之除司農寺簿時大農告匱昭先條具弊源甚悉皆允行明年都城火詔百官條時政闕失復上疏言五事失於下則五行汨於上善政脩於此則和氣應於彼因言今日民生之困官吏之冗將帥之自豐官曹之失職願陛下與二三大臣培植根本愛惜名器嚴舉國之

龍溪縣志

卷之十五 人物

三

賞罰課諸道之殿最遷寺丞出知衢州繕學宮葺城壁及津梁驛舍旱禱雨隨注郡人爭肩其輿以行歲歉檢放秋苗至萬餘斛復以錢二萬餘緡代輸折帛二稅全活不可勝計以治行最召對言外攘必先內治內治當先安民苟徒知軍需期會而民生疾苦不加卹則外攘未效先取內憂帝善其言除吏部郎輪對言時事方多宜優沿邊官吏以勵將士除浙東提刑釋平民被誣爲盜以希賞者劾貪殘屬吏幾二十餘行部戒所司無得供餽嘉定中召赴行在再除吏部郎入對言朝綱未清邦用未節士氣未振民病未



蘇四事又請監司守臣到任半載俱各條民間利害以聞除樞密院檢詳諸文字歲旱詔百僚上封事昭先條陳四病沿邊流離病於無以自贍內地楮券病於不能通行諸道刑獄病於奏報之稽遲解送之紛擾州縣賦稅病於催科之峻急征權之煩密俄除右司郎中輪對論保伍之法務在便民不宜煩擾宰執宜清中書之務轉大府少卿除直寶謨閣提點江東刑獄改主管成都府玉隆觀累疏乞致仕轉朝議大夫年踰八十而卒

余嘉字若蒙淳熙十一年進士授惠濤二州教授進聖

龍溪縣志

卷之十五人物

十四

域記特授浙西倉幹復進皇朝職志高宗政範差監樞密院激賞庫進資時十論伏闕上書論韓侂胄罪狀又上書論邊事力沮和議進古鑑錄及天文類例括象志改通直郎主管嶽祠嘉性嗜書所著周禮解禹貢攷春秋地例增釋紀年錄雜編五音姓譜又褒前後所著曰代庖集骨鯁集

趙師楷字清之宗室榮國公之後世居三山父伯壽任漳幕因家焉師楷學詩於黃樵紹熙四年舉進士授浙漕幹官有誣屬邑令者爲別白於漕使改知湘潭以薦召對論邊防募兵二事寧宗嘉納之除提舉左



帑改倅惠陽多異政守撫州慎防鹽盜民賴以安秩  
滿改廣東市舶司草無名和買之需陞計度轉運使  
攝帥事再被召首陳正心之說除大府丞未幾除直  
秘閣知建寧府進秩直寶章閣出帥廣東卒於官

孫叔謹字信之昭先子以郊恩補官調揭陽尉邑有稅  
務民苦重征叔謹力言於郡弛禁以便民除太理評  
事持法守正廷中稱平輪對言旱荒盜擾乞以賑卹  
實政責長吏以備禦實功課守帥嘉定十年登進士  
除知莆田縣治效爲諸邑冠遷泉州通判丁艱服除  
擢大理寺丞理宗卽位陞對乞脩明君德振舉治綱

龍溪縣志

卷之十五 人物

五

謹好惡於出令審輕重於用權又言長吏多推剝總  
戎多掎克請遴選監司太守制閫主將俾整飭所屬  
帝嘉納之遷大理寺卿獄囚有聽奏者朝旨劄下府  
尹遣吏至寺門已二鼓必欲啓鑰以入叔謹以夜非  
出囚之時執不可陞對進正心持久之說又言諸郡  
奏讞之獄輕罪必先論決刑寺取會之案具報必須  
如期力丐外出知潮州潮漳接境利病所熟知者卽  
日罷行之昧爽坐廳事訟牒數百剖決如流州兵素  
惰弱申嚴教閱捐俸脩學創四齋增置學田新思韓  
堂訪求昌黎手澤刊置堂壁嘗以羨錢三萬餘緡爲



三邑代輸下戶鹽役邦人立像尹祝於韓山歸以父  
蔭讓於姪士大夫賢之

宦績傳

李亨伯 黃彥臣 李 絳 謝伯宜 林 磐

王梁材 蕭 韡 黃 碩 黃 預 黃 濤

顏晞哲 黃 京 李 恂 楊汝南 黃 杞

黃 樸 黃 渙 楊承祖 陳 兢 李時中

陳宏規 顏敏德 顏 戮 陳 衡 林孔昭

林士蒙 許伯鸞 謝明之 姚 東 趙善昉

趙善封 顏振仲 趙希佞 趙希佚

龍溪縣志

卷之十五 人物

六

李亨伯字安止治平二年進士授懷安尉陞知東莞縣

縣有巨盜匿海島中出沒不時為邑大害亨伯率軍

士夜渡三洋行七百里抵香山出賊不意皆就縛海

上帖然以功遷知涪州興學舍立六賢堂多士向風

再遷知全州經理西原諸蠻威名大著終忠州防禦

使亨伯性孝友丁母憂時甘露降其家栢樹上任子

恩悉推與弟姪為文有體尤長於詩其立朝與張商

英蘇軾相友善軾子過為跋其遺文

詳見雜記

黃彥臣字叔燦弱冠登治平四年進士授南寧簿宿州

錄參歷知長汀南安二縣倅泉廣二州守莆汀劍建



四郡官至朝散大夫累贈少師彥臣倅郡時有盜被誣守欲亟置之法彥臣故緩之果獲真盜時鹽禁嚴私販至百觔論死汀有販鹽被捕至彥臣置鹽郡庭不問久之鹽化爲滷觔隨減百得不死劍建俗旣苦丁錢復以口食艱生子多不舉彥臣爲免丁錢令保正月報數於官給錢贍之子願尉晉江時造一肩輿以奉彥臣惡其侈焚之貽書切責其清嚴類此有文集二十卷雜文數卷行世子七願以世賞入官碩頊頊頊登進士顛顯金累薦免省姪孫渙曾孫樵仲杰樵皆踵世科各有傳

龍溪縣志

卷之十五 人物

十七

李絳字伯華熙寧六年進士知貴州秩滿除編脩國史出爲福州叅議尋知建州歲荒捐俸以賑左翼軍叛絳出誘諭之軍皆庭拜州賴以安子寧國朝奉大夫光國承議郎安國承奉郎孫可復可待皆郎官

謝伯宜字晞聖熙寧六年進士初知長興縣開水利蝗不入境諸臺薦於朝遷奉議郎賜緋官至尙書都官郎歷任凡六司議讞者四平反爲多秩滿家居疏通九十九坑之水築海成田由是八九都皆成沃土衆祠祀之

林磐字定國系出興化義門先世有官於漳者因家龍



溪登元豐二年進士調汀州教授知千乘縣時諸縣皆蝗獨不入千乘境歷知邵武軍丐祠以朝散大夫

致仕

里中周純林元會叟王聘同時典郡遂改所居集賢坊爲萬石坊

王梁材字廷衿元豐八年進士上書陳朝政闕失乞減省後宮及行幸不急之費帝嘉納之除京西運判晉夔州路轉運使梁材以母老不欲遠去上表云聽異鄉之鐘鼓益助悲鳴就故國之蒲魚聊供返哺帝不允復移利州路常平使攝成都府事乞就養母卒廬墓三年服闋改提舉廣南坑冶帝慰勉之謂卿屢歷艱難此行事竟當有以處卿特轉朝散大夫廣東運

龍溪縣志

卷之十五 人物

六

判卒於官

蕭韡字棠仲大觀三年進士授古田尉獲強盜三十餘人爲減贓得免死或告以贓不應賞格韡曰以人命博一官非吾志也遂以不及格補次等官調南康丞再調福清丞有誣告平民事妖術者韡爲申雪保全數百家知南恩州道遇蒺藜賊曰聞公德政願乞更生韡下車首招來之盜爲之息郡舊無城韡至捐貲倡築建學宮市田置書聚生徒教養之免其役乞祠歸卒年八十九

黃碩字若冲大觀三年與弟預同登進士調建昌教授



累官至朝散大夫年五十奉祠里居教授生徒著周禮講義時遷學不利碩請復舊捐祠俸以倡之及卒郡守李彌遜祭以文謂隱居好學不慕官榮陽亢宗馬少游之流也

黃預字幾先大觀三年進士授汝州教授未任以薦除太學正時舍法盛行預篤意訓導特轉兩官出知桐廬有惠政築亭曰虛舟作記以自況入爲監察御史以直言忤蔡京貶邠州宜祿縣尋起監廣東倉未行復貶宜祿卒有書解行世

黃濤字壽公靖康閒以薦補充行營使司準遣又差京龍溪縣志

卷之十五

人物

九

城南壁管幹軍兵糧草建炎二年充淮東帥機宜紹興明倅廣州廉潔有守資政顏岐侍郎李彌遜給事程瑀運使李利用經畧薛弼俱薦於朝

顏晞哲慥曾孫以太學登紹興二年進士授同安丞時方行經界晞哲被檄古田縣覈實公平無私邑人建生祠立碑紀德改知福清縣有政聲

黃京字葉叔紹興二年進士初在郡學與高登相友善至是又同捷南宮登授桂嶺簿京授連州戶曹益以清白稱秩滿歸里年未四十聞登以直言斥遂無仕進意性樂施予所識闕乏者厚賙之鄉人稱爲長者



李恂字顧言紹興十五年進士任縣尉以捕盜功知晉江縣歷知邵武軍以宮觀致仕恂登第時與史浩同甲後浩當軸累召不赴時論高之

楊汝南字彥侯郡守李彌遜奇其材勉就宏詞科中書以其文崛奇不署紹興十五年登第調贛州教授改廣州撫詩春秋中庸要語著經說三十篇以授學者復進表於朝祭酒楊椿歎曰真師範也薦知古田縣廉平公勤尤以教化爲先務脩學舍置學田諸生質疑問難亶亶不倦又造安福橋長六十丈以濟涉者扁其所居堂曰不欺自號快然居士鄉居講學戶外

龍溪縣志

卷之十五 人物

三

屢常滿爲文章清新有騷人典則云

黃杞字景華以祖願蔭任寧化尉有捕盜功改知浦城縣清介著聲調平陽有盜鼎者詭稱兩手俱折杞佯謂其非辜以鼎予之頂而去遂坐罪衆服神明通判太平府有圩田歲派民脩築杞屬之豪戶與免差役民得無擾除知肇慶府陞辭奏對稱旨帝目送之改知潮州有惠政尋奉祠歸朱子守郡深器重之官終朝請大夫

黃樸字文卿以祖碩蔭補懷集尉虔寇猝至樸調鄉兵往禦賊遁去調陽江尉攝邑事時大豪每持吏長短



樸摘其尤者申郡寘之法一邑肅然海寇劉承興犯高雷化三州樸駕船十餘艘出迎敵賊聞風宵遁改知安溪崇學校課農桑有賢聲京尹陳輝出帥五羊招樸於幕秩滿倅邵武又倅福州兼西外宗丞攝州及宗事二司公給一無所取力丐祠祿歸宰相梁克家薦於朝而樸逝矣留正爲布衣時樸在惠陽一見奇之及爲廣僉遂與受代不十年登政府其知人類此

黃渙彥臣姪孫也父頤以文行推於鄉渙初任歸善簿時稱廉謹嘗攝尉獲盜當改秩遜之同僚遷循州推

龍溪縣志

卷之十五

人物

三

官再爲廣東帳幹攝潯州再攝撫州皆有聲民懷之楊承祖字慶襲汝南孫弱冠通百家尤工於詩以祖澤補官初調邕之理曹斷獄得情再調循州推官於郡政多所裨贊帥雷孝友舉承祖自代改知安溪縣勞心撫字去日邑民遮道擁留及倅循陽父老迎而相語曰是前日清嚴推官也攝守惠陽饋遺一無所受以廉吏薦知新州調恩平復改梅州赴闕奏事極言一二廣便宜帝嘉納馬年五十卽丐祠歸築別墅於保福隆壽閒扁曰福壽林塘與諸賢爲真率會幅巾蕭散自樂以終



陳兢字戒叔宣和閒貢辟雍以特科調貴州法曹當路  
交薦不受職登紹興庚辰進士初尉長汀改恩平新  
興二州教授留正知贛州辟龍南令兼僉幕府事有  
周禮解及雜文數卷藏於家

李時中字守正乾道三年進士仕轍所至以廉介稱由  
延平通守入監登聞鼓院出知袁州秩滿出監廣東  
倉俸餘悉貯之庫歸囊不名一錢

陳宏規字獻可乾道三年進士慶元初以軍器監丞出  
知潮州增築韓江東岸二石洲名曰濟川闢養濟院  
以處廢疾無告者潮人祀之名宦召爲吏部郎官終

龍溪縣志

卷之十五

人物

三

朝請大夫

顏敏德字克和乾道五年進士知循州除邕筦安撫使  
邕數有峒寇敏德馭以威信卒不敢犯官至朝奉大  
夫子歿

顏歿字子治以父敏德蔭補官安黎蠻有功就改京秩  
海外諸洞剽掠昌化軍歿討捕之悉平詔改昌化爲  
南寧因命守之陞瓊管安撫使奏改差役爲催役及  
請舉士照四川例與殿試陞等推恩士民懷之立祠  
以祀

陳衡字秀平乾道八年進士授高要尉以擒海寇功改



尉寧都薦除福建帥幹遷知廉州陞辭奏差役之弊  
至郡再上章乞祠丞相京鏜曰此恬退士也除宜州  
衡力申前請許之慶元初召至京著十論以裨廟議  
除知興化軍有攜權貴書求館客者衡曰寧身當謗  
不以官物徇人居官樽節用度增糴備荒邦人爲之  
立祠

林孔昭字潛夫淳熙五年進士知永福縣有聲時丞相  
周必大薦士三十五人孔昭與焉除國子監簿遷監  
丞臺諫交章論薦出守處州

林士蒙字子正以周禮三預鄉書登淳熙戊戌進士授  
龍溪縣志

卷之十五

人物

三

歸善簿調梅陽推官廉以律已嚴以馭吏禁狼鬪之  
習民甚德之改秩知東莞縣

許伯鸞字廷徵登淳熙十四年進士知江州歲饑  
發倉賑濟僚佐請待報可伯鸞曰寧譴於君無殍吾  
民全活者數千人以母老致仕民爭攀輿留之弟伯  
鳳紹定二年特奏名歷御史臺主簿以鯁直稱

謝明之字惟學承議郎伯宜之曾孫登紹熙元年進士  
授雷州教授攝郡篆次日卽發吏卒迂代者緘印以  
俟守徐應龍至甚重之倅潮陽嘗攝郡三年以廉平  
稱應龍入中書每潮守註闕輒曰不如謝通判尋知



邕州秩滿還家以詩酒自娛與陳經楊承祖爲真率會

姚東字明仲慶元二年進士授長溪簿嘗大旱禱雨民稱爲主簿兩令丞解被火獨簿廨存人以爲誠愛所格再調保昌丞大府知其廉榦屢以疑獄見委民以爲不寃以通直郎致仕

趙善昉字文彬宗室昌王之後以濮邸近屬賜官登慶元五年進士授連江丞攝邑事脩常平倉興水利賑貧民調保昌丞時有劫盜善昉疑其非辜物色之果得真盜會有他警爲設伏浚濠寇不敢犯倅潮攝郡

龍溪縣志

卷之十五 人物

三

篆捐官田以贍學潮士德之

趙善封字德可善昉弟初補保義郎慶元二年登進士知寧德縣課農桑崇學校吏以催科引呈押輒斥去曰押一花字公家所入幾何民已不勝其擾矣乃具逋數立定限揭諸市門民感其恩信課入以登邑鹽鹽計戶抑配善封亟罷之民依山而居者以竹楮爲業苦於需索善封樽節爲之代輸民立保以祀守容州尤加意撫字較產籍以定差役立保伍以戢盜賊爲政寬平尙廉潔大帥楊長孺嘗贈以詩有清如玉壺冰淡若朱絃瑟之句



顏振仲字景玉師魯孫以祖任補登仕郎宰安溪時尉  
執平民爲盜振仲知其傭作有主釋之郡守游九功  
表其事倅莆陽攝郡事飛雄軍被調資糧不足譁於  
市振仲出撫諭之自以倅廳所積錢給軍軍皆感悅

羅拜官至朝散郎從福建通志增

趙希佞字安道宗室施國公之後開禧元年進士授古  
田尉獲盜十有七人或謂格當賞希佞曰殺人以邀  
利吾不忍也白之官長止坐其魁在終沙縣丞希佞  
所至必崇禮重賢尤尙廉潔

趙希佚字佚道希佞弟力學不倦登寶慶二年進士授

龍溪縣志卷之十五人物 五

歸善尉以謹儉廉恪聞

理學傳

陳淳王遇

陳淳字安卿居邑之北溪學者稱北溪先生少習舉子  
業林宗臣見而奇之曰此非聖賢事業也因授以近  
思錄退而讀之遂盡棄其學焉雅好濂洛諸書欲羸  
糧往從朱子受學未果紹興庚戌朱子守漳淳謁見  
出所著自警詩以爲贄朱子恨相見晚知其用工之  
久首授以根源二字謂凡看道理須各窮箇根源來  
處又曰某到此未曾將這般道理說與人今向君都



說了自是造郡齋講論終日或至夜分爲延置學宮

表率後進

問答語詳見郡齋錄

朱子去漳屢語人南來爲吾道

得一安卿門人有疑問不答者則稱淳善問後十年已未復往謁於考亭朱子已寢疾延及臥內扣其所得謂曰如今學問已見本源所闕者下學之功耳居三閱月所聞皆切要語朱子卒淳追思師訓痛自裁抑於書無所不讀於物無所不格日積月累義理貫通洞見頭緒其言太極只是一渾淪學問工夫須從萬事萬物中貫過湊成一渾淪大本又從渾淪大本中散爲萬事萬物無少窒碍然後實體得渾淪其言

龍溪縣志

卷之十五 人物

三

仁只是生生之全體此心純是天理乃可以當其名若私意行而生理息卽頑痺而不仁其言下學上達謂非專務下學便能上達須下學工夫旣至然後着上達功夫則冰融凍釋自不勞力其言理欲賓主之幾必使是非如辨黑白如遇鑛錡不容有騎牆不決之疑遇艱難險阻無不從容自適然後爲知之至而行之盡又言書乃帝王大用流行處周禮乃周公大用流行處春秋乃孔子大用流行處皆不可不盡心焉者淳天資旣高充養有道身雖不用而憂時論事感慨動人嘉定元年待試中都四方士及與平昔同



門未識面者皆來請質朝士大夫爭迎館焉道經嚴陵守鄭之悌延請郡庠僚屬之士來聽講者以數百計莆泉之士多遊其門時陸學張旺學問無源全用禪宗反託聖門以自標榜遂著道學體統師友淵源用功節目讀書次序四篇又作似道似學二辨守趙汝講延以賓師之位時造廬咨以政事淳每事開陳深中利病莆陽陳復齋宓嘗云鹽筴爲漳害最苦惟安卿條畫詳盡其說果行惠流數世何必任是邦而後爲政耶十六年癸未以特奏恩授安溪簿未仕而卒年六十五學者痛慕或奔赴其喪或就家爲位而

龍溪縣志

卷之十五 人物

三七

哭莆陳沂叙述行狀陳宓銘其墓所著有大學中庸口義字義詳講禮詩女學及北溪集五十卷門人錄其語號筠谷瀨口金山所聞淳祐丙午郡守方來於龍江書院之東關堂祀朱子以淳配焉扁曰道原堂取朱子初授語明成化閒建專祠有司致祭

王遇字子合一字子正號東湖父羽儀紹興壬戌進士官朝請郎通判衢州有文名遇甫弱冠補太學生升上舍呂東萊爲博士深器之補以學職乾道壬辰登進士甲科授臨江教授丁外艱服除改教處州繼丁內艱服除改蘄州從遊於晦庵南軒東萊三先生之



門考德問業以正學不明爲憂其學務精思力行不爲入耳出口董毅蘄陽日與諸生講說語孟經史夜漏二十刻不休蘄士化之時相欲以掌故處遇且囑往候遇日朝廷用人使之知又使之候是自取辱也不往亟趨部注懷安丞帥詹體仁鄭僑延置幕府裨贊甚多丞相趙汝愚將擢用之而僞學之禍起矣久之以給事尤袤祭酒李祥薦乃知長樂縣樽節浮費積錢數千緡興脩大塘水利溉田千餘畝時陳自強林采權勢薰灼遇不爲屈轉贛州通判韓侂胄聞其名屢欲邀之不可嘉定初擢太學博士未幾除諸王

宮教授陞毗陵守適歲旱講求荒政竭官儲以賑民凡公帑饋遺公厨宴犒一切停罷積錢數萬緡以資糴本捐俸金以資賙恤勸分通商躬省阡陌無一戶一丁不受其惠太湖港爲世家填塞爲田開濬之使復其舊詔提舉浙東常平入對言浙東水潦浸淫淮南凶民且嘯聚此何等時而不深思遠慮乎願齋戒以飭躬剛大以進德急聞直言以救闕失樂從公議以扶正道法令之施貴順上下之情貴通斷絕斜封墨勅之原常存視民如傷之念旣至官留心賑濟如在毗陵時朝議欲行計竈買鹽之策遇力爭以爲不



可謂昔人立場定額非不知竈之可數計顧惜亭民不欲盡其力耳今又計竈或有虧鹽必加刑責雖黥罪日積不可勝加非惟浮鹽難買將與額鹽全失之設使官鹽充積必有獻言計口以買鹽者是今日之計竈乃他日計口之原也議遂寢除大宗正丞遷右曹郎中嘉定四年校策殿廬事畢而卒王氏家世仁厚鄉以長者名其家至遇待宗族戚友益摯其居官所至介然自守招之不來撼之不動朱子稱其純篤東萊呂氏與其篤實勉齋黃幹謂其學識之精義利之明超然於流俗之中不以一毫私意累其心云所

龍溪縣志

卷之十五 人物

三九

著有論孟講義及兩漢博議藏於家

儒林傳

顏 慥

李唐咨

附石洪慶

林易簡

施允壽

朱飛卿

李 則

林宗臣

黃樵仲

吳 澥

蕭 里

蘇 竦

黃學臯

陳思謙

林大年

潘 武

顏慥初與蔡襄爲金石交讀書西湖白蓮院以文章德行相高慶歷閒襄爲郡幕辟本州教授倡和頗多及襄遷京職慥遂卜隱於青礁時海濱文教未興慥倡明道學教授生徒人皆化之卒祀名宦



李唐咨字堯卿與貢士州學士石洪慶

子子林易簡字

之施允壽字伯和

皆以鄉評推重朱子守郡日延於學

為諸生楷式載之公牒各有品題云李唐咨林易簡

或究索淵微或持循雅飭察其言行久益可觀施允

壽石洪慶皆以耆艾之年進學不倦強毅方正眾所

嚴憚

正德府志云四子學行即此牒可考矣若陳北溪文集有祭子餘文朱子語類有子餘語錄朱

子文集有堯卿與文公問答語而一之與伯和僅見於學牒他無考謹掇拾梗概合為一傳

朱飛卿受業於朱子自言窮理而事物紛紜未能灑落

處惟見得富貴果不可求貧賤果不可逃耳大全集

載其答問甚多

輯道南原委補入

龍溪縣志

卷之十五 人物

三

李則字康成紹興十二年特奏名少孤力學初試太學

不偶浩然東歸教授生徒至百餘人如楊汝南李恂

輩皆為名士累薦鄉書授桂嶺主簿攝富州令調泉

州德化令皆有政聲則之學兼得於蘇程二家其教

人惟以仁義為宗人稱之為鄉先生云

初宗臣字實夫遊於高東溪登之門以儒業登科官主

簿與汪叅政澈友善澈在省中宗臣貽書罷本州鬻

鹽州人德之素精藻鑑見北溪陳淳趣向不几大稱

之謂日子所習科舉之文耳聖賢大業則不在是乃

以朱文公所編近思錄授之



黃樵仲字道夫預之孫彥臣曾孫也淳熙五年與弟杰同登進士弟樵亦以是年補入太學樵仲初調永福尉再調汀州錄叅俱有善蹟俸外一無所受自書屏云俸薄儉亦足官卑清自尊謝事歸每晨興率子弟衣冠見家廟退而默坐或至終日飲食衣服不求鮮美日無過吾分暑喪三年無笑容鄉里有爲非者唯恐樵仲知之也鄧司諫守漳辟郡學行鄉飲皆請樵仲主之朱子守漳禮請入學稱其器質渾厚操履端方杜門讀書不交權利若屈居教導必能使諸生感化興起及講小學書文公每稱善奉檄校文漕闡撤龍溪縣志卷之十五人物

三

棘疾作卒之日神采自若朱子遺倅經紀其後事有禮記小學口義行世

吳澥字清臣兩請鄉舉及漕舉同文館舉皆有聲學者師之號省齋先生著述甚富援筆立成皆極精妙與永春陳知柔三山林光朝爲莫逆交知柔嘗擊節稱賞謂其貌古心古學古文古使其閉戶著書當不在楊子雲下光朝亦嘆其爲天下奇才有省齋集行於世

蕭里字元舉力學好古以周禮名家著有經解受業者多爲聞人登慶元二年進士授同安尉以廉潔聞再



調廣州教授卒楊士訓銘其墓曰里與人交上無諂  
下無狎聞人善必極口稱舉若恐人不知有不及必  
以理曉之使自悟嗜學如饑赴義如慾蓋實錄也  
蘇竦字廷儀好古力學凡所未見書必借閱手抄不輟  
博通經史玩心理學登慶元五年進士授肇慶府推  
官有廉介聲政務之暇集先儒詩易二禮傳折衷以  
已見從遊弟子率數百人

黃學臯字習之父珙紹熙中以禮記兩薦於鄉學臯博  
通經史尤長於詩書春秋朱子守漳臯與宋聞禮俱  
以稚年輪講慶元間預鄉薦入試南宮策問三舍法  
龍溪縣志

卷之十五人物

三

樊臯謂愚獨愛伊川請改試爲課及制尊賢堂待賓  
齋與時論不合有司大書曰此必僞學之流黜之嘉  
定十六年登第仕番禺簿趙帥師楷每事必資之尤  
爲丞相崔菊坡料院虞衡所器重再轉爲都陽丞待  
制李性傳延入郡齋校勘朱文公續語錄因薦之調  
泉州察推需次於家郡守方來聘居學職褒論孟義  
利數章辨析界限以訓諸生溫陵劉克遜以廉吏科  
薦之年七十餘丐祠歸手不釋卷所著有評古一冊補  
註東坡一邵卒之日飲食笑語如常凝坐而逝

陳思謙字退之學問該博教授後學嘗魁鄉薦著春秋



三傳會同及列國類編朱子喜之以語其門人李唐咨以女妻之

林大年字壽卿初試大學以詩賦中亞魁月書屢占前列累分數幾及格輒止拂袖歸養兩經恩免不愿受請於郡乞就鄉舉人或難之郡守以辭遠就近特聽其便年八十二以書義再預鄉書後不赴南宮郡延爲州學正年九十餘耳目聰明行不以杖暇日與諸生討論未見之書逍遙湖山遂終老焉

潘武字叔允嘉定庚辰特奏名履行端方於書無所不讀與陳北溪爲道義交鄉子弟多執經從遊進士趙

龍溪縣志

卷之十五 人物

三

希流吳仲脩皆出其門

忠烈傳

鄭 栻 顏公衮 胡志夫

鄭栻政和初應選補武學生時募良家子從軍栻往鄜延路總管劉延慶軍應募赴大理河與西夏戰多斬獲補承信郎賊平授汀州黃土寨巡檢捕獲賊王猪奴轉承節郎黃土寨兵黃勝等叛復以栻權巡檢勝素懼栻威名閉寨自焚宣和七年金入邊栻赴樞密院自陳乞發赴河北軍前後累立戰功歷階脩武郎時召河北兵馬入京守禦靖康元年金逼都城補爲



四門都巡檢領兵救援力戰死之紹興初劉光世請於朝授其子綸承信郎

顏公衮字鼎卿以父澤補官授興寧縣令紹定間寇陳三鎗逼境公衮出諭以大義賊怒公衮益厲聲叱之遂遇害興寧民哭之哀爲立祠事聞贈員外郎

胡志夫員外騰孫嘉定十七年辟授承節郎江東安撫使司將領使金不屈死諡忠惠

孝友傳

黃 槩 陳 玠 陳 諤 丁知微

黃槩字平叔好學力行事親至孝嘗語人曰學者學爲

龍溪縣志

卷之十五 人物

三

忠孝而已不爾雖讀書與不識字同父疾傾貲求醫父將卒曰爲人子若爾者可無憾矣以子彥臣貴封承議郎賜緋累贈朝散郎子孫登科不絕人以爲孝行之報

陳玠字待寶元豐二年進士歷建州法曹掾知沙縣監泉州市舶司遷承議郎家豪於財父鍾愛二弟貲十萬餘輒推與之

陳諤字昌國有至性少游太學累試報罷歸以其學教授里人以孝弟忠信爲本兄弟友愛不分居徽宗崇寧初郡舉八行諤爲首授岳州文學



丁知微字顯伯乾道戊子領鄉薦第一終養不仕著書授徒當事以孝旌其門敦行傳

陳湜 顏唐臣 陳昌祖 趙彥豔 丁知幾 趙彥彌

陳湜政和間嘗有牙媪遺珠於其門莫記其所久之媪過其門四顧若有所物色湜呼問之媪曰嘗遺珠為主逼取雖市屋鬻女不能償湜曰第言其狀媪以實告湜全歸之媪驚喜拜謝去里人有喪遺其白金器皿湜拾得之屢問掌事者得其實歸之嘗夢人告之

龍溪縣志 卷之十五 人物

三五

曰汝壽終七十二後八十四蓋陰德之報云

臣慥之曾孫紹興戊辰進士所居里有綠石渡

今海

地潮平可舟潮退則淤潭行者病焉唐臣乃於北涯舉土填淤築石爲隄從地跨石長二千七百八十尺作垂虹亭以憇涉者子敏若復築南隄至新亭凡一千九百尺歲久淤深孫戴復砌石增高行者便之昔嘗有謠云渡不艱待三顏

陳昌祖字世長少力學樂於周急淳熙甲午郡大饑昌祖於城四門日爲糜粥以食之全活甚衆

趙彥豔宗室廣陵郡王之後淳熙二年知臨江軍好賢



樂善郡人康庶精於天文驥折節事之及卒傾貲以恤其後所居門宇庫隘晚年築小亭於湖上以詩酒自娛許褒光贈以詩有有官千里再分竹無地半畦堪種瓜之句

丁知幾字潛仲唐承事郎丁儒之裔慶元己未特奏名授潮陽主簿有政聲以內艱歸先是縣江東南行里許自文甲官埭下至石美皆海濱鹹鹵不可田知幾與兄知微謀濬畝澮以距江淳熙二年同鄉人赴提舉司陳水利狀事下郡邑募民自文甲鑿渠以通柳營濶十有八尺深十六尺斗門二小石橋十餘所刻

龍溪縣志

卷之十五

人物

三

石立碑二都咸資其利洪武乙亥知府王仲謙榜民重脩仍命鄉民葺其祠而奠之萬歷丁亥知縣沈昌期請入鄉賢祠

趙彥彌字仲高寶慶二年進士授番禺尉歷翁源令嘉熙四年郡大饑穀斗直錢五百死者相枕藉彥彌捐私廩千餘斛日爲粥以食之不足則糴以繼全活數千人鄉人德之

文苑傳

蔡 瑗	陳伯溫	吳 與	吳 桓	鄭公敏
余 詔	蔡如松	陳 經	黃 樵	林師德



宋聞禮 趙希濬 顏復之

蔡瑗字希蘧嘉祐六年進士歷典五部官至朝請大夫徽宗登極上封事言商三宗嚴畏周文王無逸爲萬世龜鑑帝嘉納之除江淮荆浙福建廣南等路都大提點坑冶瑗以文章政事名世而聲律尤長著有鵝城集及古今名賢警句行世

陳伯溫元豐閒以詞賦稱嘗著仁者靜賦爲監元同邑王補字肩甫詞賦與伯溫並稱不就特科時稱伯溫肩甫賦中之虎

吳與字可權先漳浦人徙居龍溪元豐五年進士初爲龍溪縣志

卷之十五 人物

三七

四會令改餘于徙學宮於琵琶洲士人德之嘗與大吏論事抗爭大吏厲聲曰乃欲效漢唐令耶與曰固願學之恨不至耳大吏爲改容累遷奉議郎通判潮州時故人張天覺當國或諷之使見與曰平生與天覺語皆忠義今反欲逞身求進耶卒不往歷官凡七任悉以俸餘收書分經史子至於星歷醫卜之書各以例類餘二萬卷鄭夾深稱海內藏書者四家而首漳吳氏著有文集及荔支總錄新記錄

吳桓字孟文元豐八年進士熙寧閒陳三要三術指切時務官至朝散郎工古文詞有文稿及古律詩百篇



傳於世子南公上中興北廷錄二十事授弋陽尉不就

鄭公敏字明之幼孤與兄公顯苦學為鄉校士時號二鄭登乾道己丑進士授福清簿有政聲以薦調古田教官廣學宮新祭器建講道堂闢射圃日與諸生講聖學發明大學中庸之旨時論翕然重之有著述五卷

余詔字道夫有學術舉八行科不仕隱東湖號東湖居士以詩文自娛有栖靜堂集

蔡如松字勁節端明學士襄之族也讀書於岐山仙亭

龍溪縣志

卷之十五

人物

三

巖與顏師魯友善同預鄉薦吳澥以文鳴一時如松與之辨論不為屈乾道閒特奏名調東筦簿歷四會令新興推官晚節不樂仕以刑祿乞歸著漳南十辯

及歌詩記文等作

按一統志載蔡如松於名宦謂松知漳州種道旁松查通志及前志

歷官俱無此人今依前志具載於此

陳經字叔綸弱冠登淳熙進士調廣州司理辟新興令改福清首以教化為務倅循州知欽州封州工詩文威惠廟建通仙樓屬經為記遂援筆以丈夫當廟食仙人好樓居發其端楊長儒帥廣東得其封州軫民訓兵二詩擊節稱賞謝之云一封無已帖兩首樂天



詩與傅伯成孫昭先三老爲真率會一詩出按節歌  
之有德齋文集

黃樵字實夫預之孫未冠賦南浦歌膾炙人口淳熙中  
入太學丁內艱歸服除以例當釋褐願對大廷尋遷  
學錄獻十論於相王淮丁未登進士丙科臚唱之日  
朝士皆求識其面樵家居及在太學受業常數百人  
浙廣名士多出其門初調南劍教官日以龜山了翁  
勉勵諸生又闕貢院請諸臺閫助其役嘉泰壬戌與  
考南宮尙書木某謂人曰經義非黃架閣不收時三  
魁皆樵所取衆賀得人金壇王遂卷已被黜樵得之  
龍溪縣志

卷之十五

人物

三

謂此必博洽奇特之士得與收官止宜教郎有詩解  
中庸語孟解十餘卷

林師德字叔正紹熙元年特奏名任廣州東莞尉以獲  
盜功改承奉郎武岡軍僉判在鄉里爲學者師遊太  
學與黃樵齊名尤長於駢儷官不稱其才士論惜之  
宋聞禮字叔履嘉泰二年進士授叙化二州教授歷知  
海陽縣有易禮記詩解行於世

趙希濤字清甫宗室楚國公之後父師介通經術希濤  
少以詞賦名兼通周禮後以周禮薦胄監入宗庠由  
內舍試上舍皆入優等紹定己丑廷對乙科調客州



教授卒於官

顏復之字子開敏則孫質子也淳祐元年進士有能賦聲試禮部尋補太學已而遷太學錄再調潮幹卒於官復之貌溫氣和不苟訾笑輕財好義表裏如一與人交必見肺腑侍郎葉某薦十賢於朝復之其一也

元

儒林傳

林廣發 黃元淵 周佑 王吉才

林廣發字明卿號三溪善古文工詩郡學三聘爲諸生誦以部使者薦授安溪學職會寇作奉府檄招降以

龍溪縣志

卷之十五 人物

四

勞版改縣主簿每俘至委訊輒曰此平民也府帥問何以辨曰獲於巢穴者爲賊捕於井里者爲民此俘皆自井里得之何謂賊自是俘至多免死遷汀漳屯田萬戶府經歷卒所著有三溪集傳於世子弼別有傳

黃元淵字君翌其先南靖人入元始居龍溪至正中憲臣楊不華薦署漳州路學錄陞泉州路學正卒先是朱紹熙初朱文公居漳欲於臨漳臺作書室未果後守危稹成公志作龍江書院以聚學徒嗣守方來復於書院左建祠以祀文公元時地爲浮屠所據元淵



乃謀諸郡博士馮灝翁縣教諭郭元發使言之郡捐已貲購城東北隅地泰定四年作大成殿祀先聖先賢作祠堂祀文公以黃幹陳淳配別作講堂齋舍以處師弟子天歷四年告成而家以貧後行省上其事以龍江書院舊額列爲學宮焉

周南字于一工古文詞閩海僉事左某督師漳南佑著邊臣近鑑以獻左讀之曰史才也薦爲同安文學進其書於朝以備國史編錄至正七年舉鄉闈第一試春官不利歸遂卒門人林弼爲撰墓誌稱其質淳學正平居言不出口而其中所藏浩無涯際云

龍溪縣志

卷之十五 人物

聖

王吉才篤志古道尤明典禮郡守延爲弟子師後爲泉州路學正天性淳厚居喪盡禮耄年猶哀慕痛毀如初喪燕居亦衣冠斂容未嘗見其疾言怒色學者稱爲益齋先生

忠烈傳

蕭景懋 陳元善

蕭景懋初爲儒以家貧故力農性剛直孝友後至元四年南勝縣民李志甫作亂掠龍溪景懋與兄佑集鄉兵拒之據觀音山險橋與賊戰敗不屈賊怒縛景懋於樹齧其肉使自啖景懋聲益厲賊遂以刀決其口



至耳罵不絕聲而死事聞予恤給葬費

陳元善字長卿宋進士森之孫也自北溪蓬州遷於馬岐白石能以詩書濟其世禮訓肅其家誠信孚其鄉至正二十七年海壩逃兵作亂克渠薛均祥執元善並其妻孥欲脅之以爲民望元善不從罵曰吾所畏者天不畏者死汝賊豈能久生耶賊怒殺之妻郭氏子光遠光迪皆不屈死明嘉靖五年知縣黎良祠祀之

孝友傳

胡景清

北溪縣志

卷之十五 人物

三

胡景清宋胡騰六世孫也元兵下漳南時景清甫五歲隨父母逃難倉卒失其母及長知學每念母輒流涕一日辭其父抵幽薊尋焉忽於燕市遇其叔巨川知母曾至燕而未知其處踰年始得之蓋母子不相見者四十餘年矣事聞詔旌表之仍給驛以歸

敦行傳

林原佐 蔡 淳 黃 榮

林原佐至正二十八年海寇薛均祥犯境鄉人築砦於文山爲自全計官軍圍砦意其皆均祥黨欲盡誅之原佐避難郡城自備牛酒冒白刃往告主帥曰文山



之人素守禮義築砦以防寇耳彼實何罪帥感其言  
爲解圍去砦中數千人賴以全活

蔡淳宋治中君澤之後以廕補香州務官元至正五年  
賊萬貴與嘉禾千戶何廸立叛寇漳泉二郡漳州路  
高指揮薦淳武勇與兵三千人遣擊賊賊益兵圍之  
三匝總管遣兵赴援淳從寨中夾擊大破之餘黨悉  
平十四年復以撫叛寇李角車功授長泰尹予世襲  
黃榮字惟達預七世孫善鈞貫兵書至正閒番寇李志  
甫攻城榮輯義勇平之省臣上其功授神山懷安大  
使秩滿致政歸賊復作榮率鄉人立柵以自保賊不  
敢犯界後分省策功錫命終不受